

ԾԵՐԵՆՑԸ ՈՐՊԵՍ ՀՐԱՊԱՐԱԿԱԿՈՍ

Ականավոր պատմավիպասան Ծերենցը (Հովսեփ Շիշմանյան) անցյալ դարի երկրորդ կեսի արևմտահայ գրականության և հասարակական մտքի պատմության նշանավոր դեմքերից մեկն է:

Նա մեծ ծառայություններ է մատուցել հայ ժողովրդին՝ նրա մտավոր և հոգևոր մշակույթի զարգացման գործում:

Լինելով բազմակողմանի զարգացած անձնավորություն, Ծերենցը իր ողջ ընդունակություններն ու հարուստ գիտելիքները հանդես բերեց հասարակական կյանքի տարբեր բնագավառներում և աչքի ընկավ որպես նշանավոր պատմավիպասան, կրթող հրապարակախոս, շնորհալի մանկավարժ և հմուտ հոետոր:

Հարուստ և բազմադան է Ծերենցի հրապարակախոսական ժառանգությունը:

Հրապարակախոսությունը դարձնելով գաղափարական պայքարի զենք, Ծերենցը իր կրթող հոգվածներով արձագանքում և ասպարեզ էր հանում ժամանակաշրջանի ծնունդ հանդիսացող խիստ հրատապ ու կարևոր հարցեր: Իր եռանդուն հրապարակախոսական գործունեության ընթացքում նա ունեցել է գաղափարական տատանումներ ու դեգերումներ, որոնք բացատրվում են նրա ապրած ժամանակաշրջանի հասարակական-քաղաքական բարդ ու հակասական պայմաններով:

Ծերենցի հրապարակախոսության հատկանշական գիծը հայրենասիրությունն ու ժողովրդասիրությունն է, անհանգստությունը ժողովրդի ճակատագրի համար և ասհաշտ վերաբերմունքը դեպի հայրենի ժողովրդի արտաքին ու ներքին հարստահարիչները, դեպի այն ամենը, ինչ խորթ է ու օտար հայ ժողովրդի համար: Վիպասանի հրապարակախոսության մեջ հիանալիորեն դրսևորված են Կ. Պոլսի և առհասարակ արևմտահայ իրականության համար բնորոշ հայ հասարակական կյանքը հուզող շատ հարցեր, կապված հայ ժողովրդի ազատագրական պայքարի, պոլսահայ վերնախավի քննադատության, հասունյանների ռեակցիոն գործունեության մերկացման, հայ ժողովրդի երկու հատվածների եղբայրական կապերի ամրապնդման և այլ հարցերի հետ: Ծերենցը քաջ գիտակցում էր, որ ազգային միաձուլության և համախմբման ու ինքնուրույն պետականության ձգտող հայ ժողովրդի համար երկպառակությունները վնասակար էին ու վտանգավոր: Նկատի ունենալով այդ հանգամանքը, նա ձաղկում և դատապարտում էր կրոնական հողի վրա ծագող զժտություններն ու անմիաբանությունը:

Նա հայրենանվեր հասարակական գործչի ու հրապարակախոսի ազնիվ զայրույթով նշավակում էր հայ վերնախավերին ու նրանց գաղափարախոսներին՝ հայության մեջ կաթոլիկական ու բողոքական գաղափարներ քարոզելու և ազգային երկպառակություն սերմանելու համար:

Ծերենցը մասնավորապես անհանդուրժողական վերաբերմունք ուներ Անտոն Հասունյանի և նրա արբանյակների նկատմամբ, որպես Հռոմի պապի հավատարիմ գործակալների: Մկրտ. Պեշիկթաշլյանի հետ մեկտեղ Ծերենցը ծավալում էր հասարակական լայն գործունեություն ժողովրդի բոլոր խավերին համախմբելու ու պապականության և նրա հայ գործակալների ազդեցությունից զերծ պահելու համար: «Արդ, պապականությունը հալածելու գաղափարը տարածելու պատիվը մեզի ժամանակակից անձանց մեջ նախապես դուրսորդ Զ. Շիշմանյանի և կերպով մը անոր աշակերտն համարվող հանգուցյալ Մ. Պեշիկթաշլյանին կպարտինք ընծայել»¹. — գրում է Զ. Սվաճյանը:

Ա. Հասունյանի և նրա համախոհների հակահասարակական գործունեությունը մերկացնող ու խարազանող հոդվածներ է գրել Ծերենցը:

Մերկացնելով Հասունյանի հակաժողովրդական գործունեությունը, Ծերենցը ընդգծում է վերջինիս սերտ կապն ու համագործակցությունը Հռոմի պապի հետ. «Հասուն՝ պապականության հարազատ որդին է հոգվով, մտքով և սրտով, — գրում է նա, — ունի նա ինչ որ ճշմարիտ կաթոլիկ մը պետք է ունենա՝ նախանձահուզություն, որ ամեն տեսակ ներողամտություն կվտարե, ատելության ոգի ընդդեմ ամեն մարդու, ամեն կրոնի, ամեն ազգի, ամեն դավանության, որ արտաքին է հռոմեական եկեղեցվո»²:

Հասունյանի դեմ Ծերենցի մղած անհաշտ ու հետևողական պայքարը խորապես սկզբունքային էր իր էությանմբ ու բնույթով, որովհետև հասունյանական ոտնձգությունները ջլատում էին այն առաջադեմ ուժերին, որոնք ազնվաբար մարտնչում էին ազգային նկարագրի անաղարտության, ազգապահպանության և ազգային ինքնուրույնության համար հրամայական նշանակություն ունեցող խնդիրների լուծման ուղղությամբ:

Ըստ էության, արևմտահայ մտավորականների առաջադեմ գաղափարախոսները պայքարելով հասունյանականների դեմ, դրանով իսկ գործում էին հոգուտ լուսավորության: ու առաջադիմության, ազգային ինքնաճանաչման, ընդդեմ խավարի նախապաշարմունքների, ազգուրացության՝ պարարտացնելով այն հողը, որի մեջ պետք է ցանվեին բարձր հայրենասիրության ու անկաշառ ազգասիրության սերմերը:

Հասունյանների գաղափարաբանությունը և նրանց ընթացիկ ազգավնաս գործունեությունը առավել վտանգավոր էր դառնում և այն տեսակետից, որ նրանց գործունեության հիմքում ընկած բուն նպատակը ճիշտ էր կռահում և ընկալում թուրքական կառավարությունը, ուստի կրոնական-աղանդավորական հողի վրա կատարվող ազգապառակտիչ ամեն քայլ ու գործունեություն նա նպաստավոր էր համարում ժողովրդի գիտակցությունը մթազնելու, ճշմարիտ ազգասիրությանը վնասելու տեսակետից:

Դրանով պետք է բացատրել այն, որ թուրքական կառավարությունը յուրատեսակ թողտվություն և ակտիվ աջակցություն էր ցույց տալիս եվրոպական պետությունների միսիոներական գործակալներին:

Անգլո-ամերիկյան գաղութարարներն իրենց միսիոներներով և ֆրանսիական ու իտալական «լուսավոր» պետությունները Վատիկանի գործակալներով՝ քայքայիչ աշխատանք էին կատարում հայ իրականության մեջ:

¹ Զ. Սվաճյան, Հրապարակախոսություն, Երևան, 1960, էջ 442.

² «Փորձ», 1879, № 5, էջ 193.

Րաֆֆին «Հասունյանը և յուր կուսակցությունը» նշանավոր հոգևածում խոսելով միսիոներների վնասակար գործունեության մասին, նշում է, որ արևմտահայերի կաթոլիկական դավանանքին հարելու հիմնական պատճառներից մեկը արևմտյան տերությունների ցույց տված օգնությունն է:

«Այսքան դառն և արյունալից փորձերից հետո,— գրում է նա,— արևմուտքից օգնություն հուսալու ցնորքը մինչև այսօր տաճկաստանցի հայերի երևակայության մեջ մեծ դեր է խաղում:

Կապված լինել Հռոմի պապի — այդ արդեն ուժից ընկած ճիվաղի օգնությունը գրավել Ֆրանսիայի կոնսուլների և դեսպանների պաշտպանությունը — դոքա գլխավոր շարժառիթներն էին, որք ստիպել են տաճկաստանցի հային ընդունել կաթոլիկությունը»³:

Եվրոպական գաղութարար պետությունները միսիոներներ ուղարկելով արևմտյան Հայաստան, նպատակ էին հետապնդում ուժեղացնել իրենց գաղափարական ազդեցությունը և թուրքական կայսրության բոլոր ծայրամասերում գտնվող հայերին կաթոլիկ դարձնել: Նրանց քայքայիչ գործունեության հետևանքով խորանում էին երկպառակությունները հայերի միջև այն աստիճան, որ տարբեր կրոնական դավանանքի պատկանողները դառնում էին թշնամիներ:

Մի կողմից միսիոներական քողի տակ ծախված գաղութարարների կորստաբեր քաղաքականությունը, իսկ մյուս կողմից՝ հասունյանների ազգապառակտիչ գործունեությունը լուրջ վտանգ էին ստեղծել հայերի համար:

Ծերենցը զայրույթով անխնա մտրակում և դիմադերժում է կաթոլիկ և բողոքական միսիոներներին, որոնք հովանավորվելով Արևմուտքի գաղութարար պետությունների և Հռոմի պապի կողմից, կատարում էին իրենց քայքայիչ աշխատանքը:

Ծերենցը թե՛ հասունյանների և թե՛ ամեն կարգի միսիոներների որմնացանության դեմ մղվող պայքարին տալիս էր համազգային նշանակություն: Նա արժարժում էր այն խնդիրը, որ արհեստականորեն բաժանված երկու հատվածներում գտնվող հայ ժողովրդի առաջավոր ուժերն ու գործիչները պետք է միասնական ու համատեղ ուժերով պայքարեն միսիոներների դեմ, անկախ այն հանգամանքից, թե նրանք ո՞ր երկրից են մտել հայության մեջ: Ամեն տեսակի միսիոներների դեմ մղվող պայքարի գրավականը, ազգային ինքնաճանաչումն էր, ազգի դրոշակի տակ ծավալվող պայքարը:

Այդ տեսակետից հատուկ ուշագրություն են արժանի Ծերենցի «Տաճկահայք և Ռուսահայք» հոդվածի հետևյալ խոսքերը.

«Նույնը Ռուսահայոց եղբարց կփափաքինք տեսնել և խորհրդածել թե Լազարիսթներ, Եզվիտներ և Ամերիկայի հայերեն կաթոլիկության և պոռտեստանության քարոզիչներ կուզան, որ պաշտոն ունեն իրենց կրոնքը տարածելու Տաճկաստանի քրիստոնեից մեջ և որպեսզի իրենց կրոնական առևտուրը ավելի ազդու ընեն արևելյան խեղճ քրիստոնեից մեջ, արևմտյան ժողովուրդք արևելյան լեզուներ կուսանեն, ուսումնարանք կհաստատեն և մինչև համալսարանական գիտությանց դասերով կշլացնեն միամտաց աչքերը և այդ ուսմունքներով իրենց կրոնական քարոզությանց մեծ զորություն կուտան:

Ուստի ալդ լիճակը նկատելով, կզրուցենք մեր ռուսահայ եղբարց՝ ինչո՞ւ իրենք նաև նույն և նման հզոր տերություն մը հպատակ լինելով ու պաշտպա-

3 Ր ա ֆ ֆ ի. Հասունյանը և յուր կուսակցությունը, հատոր 9, էջ 82:

նությունն ունենալով, նույն օրինակի չեն հետևեր: Ինչո՞ւ կարգիլն զիրենք Հայաստանյաց եկեղեցվո գրողակր պարզելու ընդդեմ կաթոլիկության և պոպուլյարության հայրենի երկրին մեջ, ուսմունքով և ուսումնարանով մրցելու այդ օտար քարոզությանց հետ և նույն ազատությունը և համարձակությունքը վայելելու»⁴:

Ինչպես հայտնի է 1846 թ. սկզբներին Կ. Պոլսում մի խումբ հայրենասեր երիտասարդների՝ Մ. Պեշիկթաշլյանի, Ս. Հեքիմյանի, Ծերենցի նախաձեռնությամբ հիմնվել էր «Համազգյաց ընկերությունը», որի հիմնական նպատակը ազգային միաբանությունն ու համագործակցությունն էր:

Բնական է, որ «Համազգյաց ընկերության» ազգային լուսավորական և ազգային միավորման ուղղությամբ տարվող պրոգրեսիվ գործունեության դեմ դուրս պետք է գային մոլի հոռմեական Հասունը և նրան հարողները, ուստի նրանք զայրացած սկսում են ամբաստանել ընկերության անդամներին Հոռմի պապի առաջ՝ ներկայացնելով նրանց գործունեությունը իբրև խռովություն օսմանյան կառավարության և հոռմեական իշխանության դեմ. «Հասուն գերապայծառ,— գրում է Ծերենցը,— երբ տեսավ այս վիճակը և տեսավ նաև, որ «Համազգյաց ընկերություն» մը կելներ, որ խոսքեր և ի գործ կդիմեր, ամբաստանություն և զրպարտություն չի մնաց որ չի տեղացին, թե՛ Հոռմ և թե՛ Բ. Դուռը»⁵:

Ծերենցը դեռևս 1850 թ. Փարիզից «Արշալույս Արարատյանին» ուղարկած մի պատասխան հոգվածում, որն ուղղված էր Վիեննայի Մխիթարյաններից Հ. Ղևոնդ Վ. Հովնանյանի «Եվրոպա» թերթում լույս տեսած հոգվածի դեմ, գրում էր. «Դուք անլեզու կեցեր էք և ականատես, երբ գերապայծառ Հասունյանը կհալածե ընկերություն մը, որուն գրեթե անդամ են ձեր ժողովրդյան ընտիր մասը»:

Ծերենցի արդարացի զայրույթն ու այրող ատելությունն ընդդեմ Հասունյանների պայմանավորված էր վերջիններիս քստմենլի հայատյացությամբ, հայությունը ուրանալու հանգամանքներով և հետապնդում էր ապազգայնացման վտանգը կանխելու վեհ նպատակ:

Փառասիրության և եսասիրության տենչով բորբոքված Հասուն, 1852 թ. լատին մի վարդապետի օգնությամբ հրատարակում է մի անստորագիր գրքույկ, որի մեջ խիստ քննադատության է ենթարկում Վենետիկի Մխիթարյանների և լուսավորիչ-դեմոկրատների գործունեությունը,— հերետիկոս և հերձվածող հայոց ընկեր և բարեկամ կանվաներ Մխիթարյանք,— ասում է Ծերենցը:

Ավելորդ չի լինի, եթե այդ գրքույկից Մխիթարյաններին ամբաստանելու վերաբերյալ մի փոքր հատված մեջ բերենք, որը հրատարակված է Զմյուռնիայում լույս տեսնող «Արշալույս Արարատյան» թերթում 1852 թ. հունիսի 2-ին:

«Սուրբ Ղազարոս Մխիթարյան վարդապետները ազգայնության սկզբունքով ցնորյալ—գրում է Հասուն,— հերձվածող եկեղեցվույն հետ երևակայական միաբանության մը ետևե վազելով, կցանկան միացնել այս երկու ժողովուրդը և միմիայն ազգ կազմել. և այս պատճառով գացին երկրի տակեն բերեցին խառնակույտ դեզ մը հայոց հնությանց, թե՛ ճշմարիտ է եղել և թե՛ սուտ, որ—

⁴ «Փոքոձ», 1879, № 7:

⁵ «Եվրոպական քաղաքակրթության ներկա ժամանակներուս հայ ազգին վրա բրած ազդեցությունը», 1873, հունվար 29:

⁶ «Արշալույս Արարատյան», 1850, հոկտեմբեր 27:

պեսզի հիշեցնելով արդյան հայոց իրենց նախնյաց քաջագործությունները՝ արթնցնեն զանոնք և հետամուտ ըլլան իրենց թագավորությունը ստանալու, որուն միայն հիշատակը և անունը մնացած է այսօրվան պես»⁷:

Այդ անստորագիր գրքուկի հիմնական նպատակը արևմտահայ ժողովրդին պառակտելու և կործանելու մոլեռանդ ձգտումն է եղել: Վերջինիս լույս ընծայումը ոչ միայն անհանգստացրել էր Կ. Պոլսի հայ կաթոլիկներին, այլև այդ գրքուկը ուժեղ ազդեցություն էր գործել նաև Վենետիկի և Վիեննայի Մխիթարյանների վրա: Նրանք սարսափած հոռմեական սպառնալիքներից պարբերականների էջերում հանդես են գալիս պաշտպանողական դիրքերում, արտահայտելով այն միտքը, թե իբր հայերը պատրաստ են կատարելու հոռմեական բոլոր պահանջները՝ ընդհուպ լատինական եկեղեցու օրենքներն ընդունելը:

Ծերենցը հետևելով մամուլում տպագրված Մխիթարյանների հոգվածների արտահայտած գաղափարներին, խստորեն դատապարտում է նրանց կեղծիքն ու ստորաքարշությունը պապականության առաջ: «Եթե Մխիթարյանք խելոք կենային և հանդարտությամբ պատասխանեին այդ հիմար գրվածքին, — գրում է Ծերենցը, — վնասը բոլոր Հասունին կլիներ, բայց ղժբախտությունն այնտեղ էր, որ օրավուր նույն միաբանությունը յուր գլխավոր բարոյականը կորուսել էր և անձնական շահը սպրդեր մտեր էր յուր անդամո մեջ»⁸: Հասունյանները պապականության հլու կամակատարը լինելով ամենամոլեռանդ ձևով քարոզում էին խորթ ու վնասակար գաղափարներ՝ ընդդեմ ազգային եկեղեցու ու կրոնի: Նրանք իրենց քարոզները հանգեցնում էին ազգը կրոնի միջոցով ճանաչելուն, գլխավոր և որոշիչ հատկանիշը դարձնելով կրոնական պատկանելությունն ու կրոնական ըմբռնումները, դրանով իսկ թուլացնելով ազգայնության գաղափարը, ազգային ինքնագիտակցությունն ու ինքնաճանաչումը: Ինքնին հասկանալի է, որ սուլթանական Թուրքիայի կատաղի քաղաքականության պայմաններում հասունյանական որոգայթները հարվածում էին ազգության հիմքերին: Այդ էր, որ քաջ գիտակցում էր հրապարակախոս Ծերենցը, ուստի և նա կրթոտ ու միանգամայն վճռական կերպով ձեռնոց էր նետում հասունյաններին և անխնա քննադատում նրանց գործունեությունը:

Ծերենցը խորթ բաց չէր թողնում ժողովրդական հոծ զանգվածներին և մտավորականության ապակողմնորոշված ներկայացուցիչներին հստակ ու մեկնե՛ն բացատրելու Հասունյանի նպատակներն ու ձգտումները, որոնք լիովին խորթ էին ու հետադիմական: Նա ոչ միայն իր հրապարակախոսական հոգվածներում, այլև առհասարակ իր բոլոր գրավոր ելույթներում ու ճառերում տարբեր տեսանկյուններով անդրադառնում էր այդ կարևորագույն հարցին:

Հասունյանների դեմ Ծերենցի մղած պայքարը եղել է անողորմ, կրթոտ ու բուռն և միշտ պսակվել է հաջողությամբ՝ հօգուտ ազգայնության գաղափարի ուժեղացման և հայրենասիրության բարձրացման:

Ծերենցը իր հոգվածներում անդրադառնալով կաթոլիկ և լուսավորչական եկեղեցիների միջև մղվող անհաշտ պայքարին, այն եզրակացության է հանգել, որ վճռական նշանակությունը պետք է տալ լուսավորչական եկեղեցուն, որի միջոցով, ըստ նրա, հնարավոր է հասնել ինքնագիտակցության և պահպանել ազգի միասնությունը:

⁷ Ա. Չ ո Ր ա ն յ ա ն, Մ. Պեշիկթաշլյան, Փարիզ. 1907, էջ 162:

⁸ «Փորձ», 1879, № 5, էջ 200:

Հաճախ է նա ընդգծել այն հանգամանքը, որ ինքը հայ «ազգային եկեղեցու» լուսավորչական եկեղեցու ջերմ հետևողներից է, և այդ եկեղեցին է համարում միայն առաջավոր եկեղեցի. «Ես համոզված եմ, վերապատվելի հայր,— գրում է նա Փարիզից Հ. Ղևոնդ Հովնաթյանին ուղղված հոգևածում,— թե ազգին ճշմարիտ բարիք ուղղներն և անոնց մտածմունքը այս դժբախտ բաժանման պատճառն ու բաժանումը. վերցնելու, ազգին պզտի մասը, մեծ մասիս հետևեցնելն է, այսինքն՝ բոլոր հայ ազգը էջմիածնա կաթողիկոսին հնազանդեցնելը»⁹:

Ծերենցը միամտություն ունի հավատալու, թե սուլթանական բռնակալական ծանր լուծը թոթափելու և ազգային պետական ինքնուրույնություն ձեռք բերելու գործում միակ որոշող դերը կարող էր խաղալ լուսավորչական եկեղեցին:

Սակայն այնպես, ինչպես ժամանակաշրջանի մի խումբ լուսավորիչ-դեմոկրատներ չկարողացան ցույց տալ հասարակական հարաբերությունների վերափոխման ուղիները, այդպես էլ Ծերենցը իր աշխարհայացքի սահմանափակության հետևանքով չկարողացավ հասկանալ, որ տվյալ պայմաններում լուսավորչական եկեղեցին չէր կարող լուծել ազգային միասնական ուժերի և պետականության վերականգնման հարցը:

Պատմական մոտեցման տեսակետից Ծերենցի մոտ դրականը այն է, որ հայրենասեր հրապարակախոսը ցանկացել է լուսավորչական եկեղեցու միջոցով, որպես կարևոր գործոնի, ակտիվացնել պայքարը պապական ազդեցության դեմ և նպաստավոր հող ստեղծել ազգի միաձուլման և համախմբման համար՝ ընդդեմ ազգապառակտիչ ուժերի ու գործողությունների:

Նա որպես ազգային առաջավոր գործիչ, մինչև կյանքի վերջը համառորեն պայքարել է հասունյանների, միջնադարյան խավարամտության, ազգային ճնշման և հասարակության զարգացումը կաշկանդող ամեն տեսակի կապանքների դեմ, հանուն լուսավորության և ազատության հաղթանակի:

* *

XIX դարի 50—60-ական թվականներին Թուրքիայի տնտեսական-քաղաքական կյանքում տեղի էին ունենում զգալի փոփոխություններ:

1853—1856 թթ. Ղրիմի պատերազմը նոր դժվարությունների առաջ անցնեց սուլթանական Թուրքիային: Նոր իրադրության պայմաններում, թուրքական կառավարությունը տեսնելով դեմոկրատական շերտերի որոշակի աշխուժությունն ու օրեցօր ազդեցիկ ուժ դառնալը, ցանկանում է մասնակի յիջումներով խտրել հայ բուրժուազիային և նրան դարձնել իր հլու կամակատարը: Այդ ծրագրի կենսագործումը հանդիսացավ Թուրքիայում ապրող հայերի ներքին կյանքի ղեկավարմանը վերաբերող մի կանոնադրության հաստատումը: 1860 թ. մայիսի 24-ին ընդունված և հաստատված կանոնադրությունը ն. Ռուսիյանը մկրտում է «Ազգային սահմանադրություն» անվամբ: «Ազգային սահմանադրությունը» իր պատմական նշանակությամբ պրոգրեսիվ երևույթ էր. նրա ստեղծմամբ ինչ-որ չափով սահմանափակվում էր ամիրաների և կղերականների կամայականությունները, սահմանվում էր վերահսկողություն «ազգի» ելումուտական ծախքերին, հնարավորություն էր տրվում

⁹ «Արշալույս Արարատյան», 1850, հոկտեմբեր 27:

արեւմտահայ դեմոկրատական խավերի ներկայացուցիչներին մասնակցելու ազգային գործերի կառավարմանը: «Սահմանադրութեան» հռչակման շրջանում, ինչպէս նաև 1860-ական թվականի սկզբին, ապագա արեւմտահայ դեմոկրատական հոսանքի ներկայացուցիչները՝ Հ. Սվաճյանը, Մ. Մամուրյանը, Մերենցը մեծ հույսեր էին կապում «Ազգային սահմանադրութեան» հետ:

Մերենցը արեւմտահայ առաջադեմ գործիչների հետ կանգնած լինելով սահմանադրական շարժման կենտրոնում, եռանդուն գործունեություն էր ծավալում ազգի համախմբման և նրա ուժերի հավաքագրման ուղղությամբ, վճռական պայքար ծավալելով ազգապառակտիչ ուժերի դեմ: «Երբ ազգը մեկ ձեռքով արտաքին հարստահարողաց դեմ բողոք-բողոքի վրա դնելով արդարություն պիտի խնդրե և դռնէ իր զավակները պատսպարելու համար,— գրում է նա,— մյուսովն ալ պետք է ջախջախե այն ներքին հարստահարողներին, որ գայլ են իրենց ժողովուրդոց, որ շար օրինակ են իրենց հօտին, որ իրենց տգիտությամբ կույրք են կուրաց առաջնորդք, որ պճնասեր զարդերով նման են գերեզմանաց բոկոց»¹⁰:

Մերենցը իբրև ազգային լուսավորության աներկյուղ քարոզիչ և աննկուն գործիչ իր գինակիցներ՝ Գր. Օտյանի, Ն. Խուսիսյանի, Սերվիլիի և այլոց հետ, եռանդագին առաջ էր մղում լուսավորական շարժումը և ջանում էր «Ազգային սահմանադրությունը» օգտագործել իբրև կարևոր ազդակ ազգի քաղաքական զարթոնքի և ինքնաճանաչման համար. «Քանի մը երիտասարդք առանց փորձառության հաջողեցան պայն ստեղծել (խոսքը Սահմանադրության ստեղծման մասին է—Վ. Շ.), որ այսօր հայ ազգը իր նեցուկը, իր խարիսխը, իր փրկությունը կանվանե և կտոնե»,— գրում է նա¹¹:

Սահմանադրության հարցի շուրջը մամուլում և բանախոսության մեջ ծավալվող բանավեճերին, Մերենցը վերաբերվել է հատուկ հետաքրքրությամբ և հանդես եկել թե՛ գրավոր և թե՛ բանավոր՝ անսքող արտահայտելով իր հայացքներն ու տեսակետները: Նրա ըմբռնմամբ ազգային սահմանադրությունը արժանի էր համակրանքի և պաշտպանության: Պարբերականի էջերում տպագրված նրա հոդվածներից ակնհայտ է դառնում հրապարակախոսի դրական վերաբերմունքը դեպի «Ազգային սահմանադրությունը»: «Ի շնորհիվ Սահմանադրության,— գրում է նա,— հայ մամուլն էլ ազգային նյութոց վիճաբանության համար կատարյալ ազատություն կը վայելե չի զրուցելու թե մեծ ծառայություններ կրնե ազգին, նաև մինչև արտաքին հարստահարությանց քիչ շատ առաջքը տունելով, ժողովրդական տգիտության շափով դարման մը մատուցանելով»¹²:

Պետք է ասել, որ սահմանադրական շարժումը շնայած իր առաջադիմական բնույթին բնավ միատարր չի եղել: Այդ շարժմանը հարել են հասարակական-քաղաքական տարբեր հայացքներ ունեցող մարդիկ, որոնք «Ազգային սահմանադրության» ստեղծման շուրջը ծավալվող պայքարի ընթացքում բաժանվել են առանձին խմբավորումների՝ սահմանադրության կողմնակիցների և հակառակորդների:

Սահմանադրության կողմնակիցները ցանկանում էին սահմանափակել պատրիարքի իրավունքները և վերջ տալ ամիրայության տիրապետությանը.

¹⁰ «Մասիս», 1872, № 1209, էջ 2:

¹¹ Նույն տեղում, էջ 1:

¹² Նույն տեղում, № 1194, էջ 2:

նրանք աշխատում էին իրենց ձեռքը կենտրոնացնել «ազգի» կուլտուր-կրթական և բարեգործական հիմնարկների գործունեությունը, կարգավորել և վերահսկել ֆինանսական գործերը. այս խումբը լիբերալ սահմանադրականների խումբն էր:

Մյուս խմբավորումը պոլսահայ իրականության մեջ գործող կղերամիրայական ռեակցիոն տարրերն էին, որոնք համախմբվելով ռեակցիոն գաղափարախոս Հովհաննես Չամուռճյանի (Տերոյենց) շուրջը, համառ պայքար էին ծավալում տապալելու Սահմանադրությունը: «Դաս մը մարդիկ, իրենց ընթացքեն, իրենց խոսքերեն կիմացնեն,—գրում է Մերենցը,— թե գաղտնի մեքենավարությանց կը ծառայեն, և թե ոչ միայն իրիմյան, այլև սահմանադրությունն միանգամայն կուզեն տապալեն»¹³:

Եվ, վերջապես, պոլսահայ հասարակության հաջորդ խմբավորումը, որը սկիզբ էր առել 1850-ական թվականների վերջերից, «Մեղու» թերթի խմբագիր Հ. Սվաճյանի շուրջը համախմբված տարրերն էին, որոնք անմիջական կապ էին սյահականում հեղափոխական-դեմոկրատ Մ. Նալբանդյանի հետ:

Պայքարի առաջին շրջանում, այսինքն՝ 1857—1862 թթ. Մերենցը, ինչպես նաև արևմտահայ մյուս դեմոկրատները ապրում էին սահմանադրական պատրանքներով: Սակայն «Սահմանադրության» շուրջը մղվող պայքարի երկրորդ էտապում նա այլևս չէր պատկանում այն գործիչների թվին, որոնք չափից ավելի մեծ նշանակություն էին տալիս «Սահմանադրությանը» և խիստ միակողմանի կերպով թմբկահարում այն՝ գերազնահատելով նրա դերն ու նշանակությունը:

«Մեր ազգը թեպետ ներքին կառավարություն մը ուներ,—գրում է նա,— բայց այդ կառավարությունը բավական ժողովրդական չէր, իր ազգին սիրելի ըլլար և բարոյական ազդեցություն մը ունենար բավական զորավոր չէր, որ իր ազդեցությունը հնազանդություն գտներ, ուստի այս տարտամ վիճակը, դարմանի մը պետք ուներ, բայց այդ դարմանի ոչ անունը գիտեր ժողովուրդը և ոչ գաղափար ուներ»¹⁴:

«Ազգային սահմանադրության» կենսագործման սկզբնական շրջանում, 1860 թ. սեպտեմբերի 1-ին, Մերենցի նախաձեռնությամբ հիմնադրվում է «Բարեգործական ընկերությունը», որը փաստորեն 1846 թ. «Համազգյաց ընկերության» վերակազմավորումն էր:

«Ընկերության» տնօրեն կազմի մեջ մտնում էին՝ Գր. Օտյանը, Մկր. Աղաթոնը, Սեր. Թագվորյանը, Մերենցը, Մ. Մյուհենտիսյանը, ընկերության ընդհանուր ժողովի նախագահը՝ Մկր. Աղաթոնն էր:

«Ընկերության» անդամները 1861 թ. մշակում են կանոնադրությունը. այդ հանձնախմբի ատենադպիրը Մերենցն էր:

«Բարեգործականի» հիմնական նպատակը «ազգին որը, անտեր և չքավոր տղայքը երկրագործության և արվեստից զբաղեցնելու միջոցներն ի գործ դնելն էր»¹⁵: «Ընկերության» առաջադրած հիմնական նպատակների մասին մեզ գաղափար է տալիս «Կոունկ հայոց աշխարհի» ամսագրում տպագրված «Հայ-

13 «Արևելյան մամուլ», 1873, 23 սոցոստոսի:

14 «Եվրոպական քաղաքակրթության ներկա ժամանակներուս հայ ազգին վրա ըրած ազդեցությունը», 1873, էջ 19:

15 «Կոունկ հայոց աշխարհի», 1862, էջ 620:

տարարությունը», որտեղ Ծերենցը մանրամասնորեն մեկնաբանում է «Ընկերության» գործունեությունն ու ծրագիրը: «Բարեգործականի» հեղինակները ցանկանում էին առևտրական հարաբերությունների զարգացման համար հարթել ուղի՝ ընդօրինակելով եվրոպական քաղաքակրթությունը, և միաժամանակ մտահոգվում «դարման» գտնել վերացնելու կապիտալիստական հարաբերությունների զարգացման հետևանքով առաջացած թշվառությունները: Ո՞րն էր լինելու այդ դարմանը: «Շատ դյուրությամբ լուծելու խնդիր մըն է ասի,—պատասխանում են նրանք: Բայց արհեստավոր և երկրագործ ազգ մը՝ իր ձեռքի արվեստն ու երկրագործությունը անգիտանալու համար թշվառության մատնված՝ ուրիշ կերպով չը կրնար կանգնիլ, բայց միայն նոր քաղաքականության պահանջած արվեստներն ու երկրագործությունը ձեռք բերելով»¹⁶:

Մեզ համար մի կարևոր փաստաթուղթ է այդ «Հայտարարությունը», որտեղ առաջադեմ գաղափարախոսները երկրագործության տարածման ճանապարհով ձգտում էին զարգացնել ազգային արդյունաբերությունը: Նրանց ծրագրերում մեծ տեղ էին գրավում ազգության սոցիալական դրության բարելավման հիմնական խնդիրները:

Սակայն ո՞րն էր լինելու այն երկիրը, որը պիտի կարողանար իրականացնել «Բարեգործականի» անդամների տարիներ շարունակ փայփայած երազանքները:

Նրանք գործունեության ծավալման համար ասպարեզ են ընտրում ոչ թե բուն Հայաստանը, այլ Կիլիկիան: Կիլիկիայի հայերին տնտեսական օգնություն ցույց տալու և այնտեղ առևտրա-արդյունաբերական կենտրոններ հիմնելու նպատակով «Ընկերությունը» հավաքում է զգալի քանակությամբ մի գումար և Կիլիկիա է ուղարկում Ծերենցին՝ «ազարակ մը գնելու և երկրագործական վարժարանի մը հիմնարկության «Ընկերության» նպատակը իրագործելու»¹⁷:

«Այսօր,—գրում է Ծերենցը,—երբ բազմաշարշար մեր Հայաստանի որդիք ցրվյալ եղբայրց կղիմեն օգնության, Կիլիկիո հայուն վրա, երբ կծանրանա բռնության ձեռքը՝ ընկերություն մը կկազմվի Պոլիս Կիլիկիո հայ երիտասարդության օգնելու համար»¹⁸:

Ծերենցը 1862 թվականին ուղևորվում է Կիլիկիա:

Դա այն ժամանակաշրջանն էր, երբ Ֆրանսիական բուրժուա-դեմոկրատական հեղափոխության և իտալական ազատագրական շարժումների ազդեցության ներքո, Թուրքիայի տիրապետության տակ գտնվող հպատակ ժողովուրդները, որոնց թվում նաև հայերը՝ չղիմանալով տնտեսական և իրավական ծանր ճնշումներին, բարձրացնում են ազգային-ազատագրական պայքարի դրոշը:

Թուրքական բռնակալության դեմ ուղղված հայ ժողովրդի ազատագրական շարժման ամենափառահեղ դրվագներից մեկը՝ Զեյթունի հերոսական ապստամբությունն էր:

Օսմանյան կառավարությունը երկյուղ կրելով, որ նախապատրաստվող ազատագրական շարժումներին կարող են մասնակցություն ցույց տալ նաև Զեյթունի բնակիչները, փորձում է այնտեղ կենտրոնացնել զգալի քանակու-

¹⁶ Նույն տեղում, էջ 614—615:

¹⁷ «Փորձ», 1879, № 29:

¹⁸ Նույն տեղում:

թյամբ գործ: «Ցավալի լուրեր կհասնին Տավրոսի լեռներեն,—գրում է Մերենցր իր հողվածներից մեկում,—Մարաշի փաշան իր ղորքերով այս քաղաքին մոտ գտնված հայու գյուղերը կոխեց, 200 հոգի սպանվեցան, եկեղեցին ու տներն հրո ճարակ դարձան»¹⁹:

1860 թ. կեսերին թուրքական գործը Ազիզ փաշայի հրամանատարությամբ նախապատրաստվում է մի նոր արշավանքի Զեյթունի գեմ: Այդ մասին մեզ ուշագրավ տեղեկություն է տալիս դարձյալ Մերենցր. «Ալի փաշան (մեծ վեզիրը) պրուցած էր 1861 թվականից առաջ դոկտոր Պառաթ՝ հռչակավոր գերմանացի ճանապարհորդին, թե՛ «Կիլիկիո լեռներուն մեջ կան մի քանի ապստամբ ժողովուրդք, հուսամ թե քիչ ատենեն զանոնք անհետ կանենք»²⁰:

Մերենցի հողվածից մեջբերված տեղեկությունից կարելի է ենթադրել, որ թուրքական պետությունը Զեյթունի վրա հարձակվելու գաղափարը հղացել էր դեռևս 1861 թ. և նրա հիմնական նպատակը հայ լեռնականներին բնաջնջելն էր:

Զեյթունցիների 1862 թ. ապստամբության նախապատրաստման ու ղեկավարման գործում նշանակալից դեր են կատարել արևմտահայ ինտելիգենցիայի առաջավոր ներկայացուցիչները: Այնպիսի հասարակական գործիչներ, ինչպիսիք էին՝ Մ. Պեշիկթաշլյանը, Հ. Սվաճյանը՝ Սեր. Թագվորյանը, Մերենցր և շատ ուրիշներ կապեր են ունեցել Զեյթունի ապստամբների հետ:

Արժանի է հիշատակել Մ. Նալբանդյանի կատարած մեծ դերը արևմտահայ ազատագրական շարժումները ղեկավարելու գործում:

Կան վկայություններ այն մասին, որ Նալբանդյանը մտերիմ հարաբերություններ էր մեջ է եղել «Բարեգործականի» անդամների հետ: Այդ մասին ստույգ տեղեկություն է տալիս Սեր. Թագվորյանի 1862 թ. մայիսի 14—26-ր թվակիր ուղարկած նամակը Պետերբուրգ՝ Մ. Նալբանդյանին: Այս կիսածածկագիր նամակի մեջ լեզինակը խոսում է գաղտնի խմբակի աշխատանքների կազմակերպման ու նրա հետագա գործունեության մասին:

Այնտեղ հիշատակվում է «Բարեգործականի» անդամների ունեցած կապը Զեյթունի ապստամբների հետ և վերջիններիս օգնություն ցույց տալը Զեյթունի հերոս ժողովրդին: Այստեղից հետևում է, որ Նալբանդյանը անմիջական մասնակցություն է ունեցել արևմտահայ ազգային-ազատագրական շարժումներին, և բնավ պատահական չէ, որ «Բարեգործականի» անդամները ղեկավարող ցուցումներ են ստացել մեծ հեղափոխականից:

Արդյոք Մերենցր որևէ գործնական կազմակերպչական կապեր ունեցել է Մ. Նալբանդյանի հետ: Թեև մինչ այսօր փաստական, ուղղակի և կոնկրետ տվյալներով չի պարզաբանված Մերենցի՝ Նալբանդյանի հետ ունեցած անձնական ծանոթության հանգամանքը, ինչպես նաև Զեյթունի 1862 թ. ապստամարտի անմիջական մասնակից լինելը, բայց հրապարակի վրա եղած որոշ փաստեր անառարկելիորեն ապացուցում են Մերենցի մասնակցությունը Զեյթունի ապստամբության ու Նալբանդյանի հետ նրա ունեցած ծանոթության հանգամանքը: Հայտնի է մի բան, որ Հրանտ Ասատուրը իր «Մերուկ Մալթրզը» փոքրիկ ակնարկում խոսելով Մերենցի հետ ունեցած առաջին հանդիպման մասին, տալիս է այն վկայությունը, որ հայրենասեր այդ մարդը շատ բաներ է պատմել իրենց 1860 թ. սերնդի և Նալբանդյանի մասին, որին անձամբ ծա-

¹⁹ «Փորձ», 1879, ապրիլի 29:

²⁰ Նույն տեղում:

նոթ է եղել: Ինչպես տեսանք, Ծերենցը 1862 թ. մեկնում է Կիլիկիա: Ջեյթունի նշանավոր ապստամբության նախօրեին և թե ապստամբությունից հետո նա անմիջական կապեր է հաստատում ապստամբների հետ և գործնական օգնություն ցույց տալիս նրանց: Դեռ մասին մեզ ուշագրավ տեղեկություն է տալիս Սեր. Թագվորյանի նամակը՝ ուղարկած Նալբանդյանին: Վերջինս լինելով «Բարեգործական ընկերության» ղեկավարներից մեկը, հաճախ Նալբանդյանին իրազեկ է պահել «ընկերության» անդամների Կիլիկիայի հետ ունեցած փոխադարձ կապի մասին: «Տավրոսեն վարդապետ մը եկավ հոս,—գրում է նա,—քանի օր է, որ կաշխատիմ առուտուր մը ընեմ այս մարդու հետ. հազիվ կրցա 20—30 հոգիով ժողով մը կազմել և այն ալ մեծ դժվարությամբ: Քիչ մը ստակ էս, քիչ մըն ալ բարեկամին մեկը տվինք անոր, որ հարկավոր եղած դասագրքերը առնե և ճամփու ծախք ընե: Մնացածին համար խոսք տվինք, որ պիտի աշխատինք իրենց համար»²¹: Ուրեմն, պետք է ենթադրել, որ «Բարեգործականի» անդամները, որոնց թվում նաև Ծերենցը, անմիջական կապ են պահպանել հեղափոխական-դեմոկրատի հետ և նրանից ստացել ղեկավար ցուցումներ:

Ջեյթունի 1862 թ. հերոսամարտերից հետո հայ կաթոլիկ համայնքի պետ Ա. Հասունյանը թուրքական կառավարության առաջ սկսում է ամբաստանել ընկերության քաղաքական նպատակադրումը. «Բարեգործական ընկերության» կազմությունն և Շիշմանյանի Պոլսեն մեկնելը խռովեցին Հասունի ոգին»,—գրում է Ա. Արփիարյանը:

Թուրքական կառավարությունը օգտագործելով Հասունի մեղադրական ակտը, իսկույն հրամայում է դադարեցնել «ընկերության» գործունեությունը:

Ծերենցը, որ դեռ մինչ այդ գտնվում էր Կիլիկիայում, հրաման է ստանում անհապաղ վերադառնալ մայրաքաղաք: Պետությունը նրան մեղադրում է թուրքական կառավարության դեմ հեղափոխություն նախապատրաստելու մեջ: Նա անմիջապես վերցվում է հսկողության տակ, իսկ «Բարեգործական ընկերությունը» բռնաբերվում է ենթարկվում:

* * *

1871 թվականի հունվարին Չմյուռնիայում լույս է տեսնում «Արևելյան մամուլ» ամսագիրը, որը, հիմնովի, նոր էջ է բացում արևմտահայ մամուլի պատմության մեջ: 1872 թ. հրապարակախոսը սկսում է թղթակցել «Արևելյան մամուլ»-ին «Ծերենց» ծածկանունով:

Մ. Մամուրջանը սիրով ընդունում է նոր թղթակցին և դրվատում նրա կախարհական գրիչն ու «հոգու թռիչքը»: Հանդեսի 1872-ից մինչև 1878 թ. տարբեր համարներում «Ծերենց» ստորագրությամբ տպագրված թղթակցություններով նա մեզ ներկայանում է որպես կրքոտ հրապարակախոս: «Արևելյան մամուլի» 1873 թ. № 11-ում տպագրված թղթակցություններում Ծերենցը քննադատում է կրոնական ու պատրիարքական ժողովների կառուցվածքը, մասնավորապես այդ ժողովներում քննարկվող հարցերի շուրջը առաջացած վիճաբանությունները:

²¹ Տե՛ս Սեր. Թագվորյանի նամակը Մ. Նալբանդյանի «Ունտիպ երկերում», էջ 445—446:

Շատ ավելի կարևոր է թղթակցության երկրորդ մասը, ուր Մերենցը խիստ ծաղրում է «Ազգային» գործիչներին: «Սահմանադրությունը վերաքննելի կըսենք և կը դավանինք, — գրում է նա, — և երբ վերաքննության կհասնինք այնչափ անկարող ենք, որ տարիներով անշարժ ձեռքերնիս կկարկամի հողված մը փոխելու: Կրոնական ժողով մը ունինք, որ ոչնչով չի զբաղվում. թատրոններ կան, ուր ժողովուրդը գործողության միայն տեսնելու կհաճախե և մտավորական լույս փնտրելու փափագ չափ քիչ կը ցուցանե»²²:

Այսպիսով, հրապարակախոսը «Արևելյան մամուլի» էջերում հրատարակված բազմաթիվ հողվածների մեջ շփտելով «Ազգային սահմանադրության» կարևորությունը, նրա դերն ու նշանակությունը, միաժամանակ քննադատում է քաղաքական և կրոնական ժողովների բնույթն ու սահմանադրական հիմնարկների մեջ եղած ազգային հատկանիշներից զուրկ անգործներին:

Ինչպես հայտնի է ռուս-թուրքական պատերազմի նախօրյակին Բալկանյան թերակղզում սլավոնական ժողովուրդները ազգային-ազատագրական պայքար էին մղում Թուրքիայի դեմ և ոգևորում նաև հայ հասարակական միտքը:

Հեղափոխական-դեմոկրատական ուղղության գործիչները, ինչպես նաև լիբերալներից շատերն ու ազգային-պահպանողականներից ոմանք արևմտահայ ժողովրդի ազատագրումը տեսնում էին թուրքական լծի դեմ բալկանյան ժողովուրդների պես ըմբոստանալու, զինված պայքարով սեփական ազատ ու անկախ հայրենիք ստեղծելու գաղափարի մեջ:

1876 թ. Թուրքիայում տեղի է ունենում պալատական հեղաշրջում: Թոփ-Գափուի պալատում դավադրաբար սպանվում է Աբդուլ Ազիզը: Նույն թվականի օգոստոս ամսին «Երիտասարդ թուրքերը» գահ են բարձրացնում Աբդուլ Մեջիդի որդուն՝ Աբդուլ Համիդին (1876—1909 թթ.): Ստեղծված ներքին բարդ իրադարձությունների ճնշման տակ Աբդուլ Համիդը 1876 թ. դեկտեմբեր ամսին հրապարակում է օսմանյան նոր Սահմանադրությունը, որով իբր թե հավասար իրավունքներ էր շնորհվում հպատակ բոլոր ժողովուրդներին, որոնց թվում նաև հայերին: Հրապարակված նոր Սահմանադրության նկատմամբ հայ հասարակական-քաղաքական տարբեր խմբավորումները ունեին տարբեր տեսակետներ և տարբեր նպատակներ: Արևմտահայ գործիչների մի մասը, այդ թվում նաև Մերենցը՝ տարված սահմանադրական պատրանքներով, որոշ հույսեր էր կապում թուրքական պետության խոստացած Սահմանադրության հետ:

Այսպես՝ «Բարձրագույն եպարքոս Մահմուդ փաշայի շրջափերականը» նշանավոր հողվածում հրապարակախոսը գրում է. «Վեհափառ սուլթանը յուր գահակալության օրեն մինչև այսօր կրկին ու կրկին արդարություն խոստացավ: Յուր պաշտոնատյարց պարտքն էր նորա խոստմունքը կատարել, և ահա կուգա Մահմուդ փաշա ինքն ալ համոզված, թե այս երկրին միմիայն բարոյական կապն արդարությունն է... Ամեն իմաստուն կառավարություն, որ հայրական է, պարտականություն ունի այդ ազատությունը չէ թե միայն չի վտարելու, այլև տարածելու և սնուցելու յուր գրկին մեջ, և օգուտ աշխարհիս և հայրենյաց»²³:

Սակայն, ինչպես որոշ մտավորականների, այնպես էլ Մերենցի հույսը կարճ ժամանակամիջոցում հօդս ցնդեցին: Դույություն ունեցող պատմա-քա-

²² «Արևելյան մամուլ», 1873, № 11.

²³ «Մասիս», 1871, № 1154.

դաքական իրավիճակը բացահայտեց Սուլթան Համիդի հորինած Սահմանադրութեան ողջ կեղծութիւնը: Հայ գործիչների համար էլ պարզ դարձավ, որ դա խաբէրայական միջոց էր, քանի որ հրապարակված Սահմանադրութիւնը ոչ միայն չբարելավեց թուրքական բռնակալական կարգերում հեծող արեւմտահայ ժողովրդի առանց այն էլ ծանր դրութիւնը, այլ ընդհակառակը՝ այն դարձրեց առավել ողբերգական:

«Մենք՝ Թուրքիայի հայքս, ինչպէս բնական էր, կուզեինք այդ հավատի անխտրութիւնը և քրիստոնյաների և մահմեդականների մեջ իրավունքների հավասարութիւնը, բայց շտվին, որ ունենայինք և բռնի պահանջելու կարողութիւն էլ չունեինք»²⁴, — գրում է հուսախաբված Մերենցը:

Սահմանադրութեան հռչակումից հետո Թուրքիայում գոյութիւն ունեցող քաղաքական անարխիան, սլետական շահագործումը, բարբարոսական ճնշումներն ու հալածանքները քայքայում են ժողովրդական մաստաներին, զրկում նրանց ապրուստի նվազագույն միջոցներից:

Ստեղծված ծանր դրութիւնը հարկադրում էր անհանգրվան աշխատավորին թողնել դարավոր հայրենիքը, տունն ու տեղը և գաղթել օտար երկրներ:

Հայերի մասսայական տեղահանութիւնը երկրից դառնում է մի իսկական ազգային ողբերգութիւն. մամուլը ահազանգում էր հասարակական մտքի տարբեր հոսանքների դիրքորոշումը ազգային դժբախտութեան տխուր հետեանքների մասին: Արտագաղթի դեմ հանդես էին գալիս ժամանակի հայ մտավորականութեան առաջավոր ներկայացուցիչները՝ Րաֆֆին, Գր. Արծրունին, Մ. Մամուրյանը, Տեկանցը և ուրիշներ:

Մի ինքնատիպ երևույթ էր 1876 թ. «Արևելյան մամուլ»-ում տպագրված Մերենցի նամակը գաղթականութեան խնդրի վերաբերյալ:

Մերենցը անդրադառնալով հայերի տարագրութեան աղետալի երևույթներին, չի կարողանում ճիշտ բացահայտել արտագաղթի հիմնական պատճառները: Նրա կարծիքով, գաղթելով հայրենի երկրից անդաստանական հայր հարստութիւն և անձնական երջանկութիւն կարող էր ձեռք բերել միայն օտար ափերում (Հնդկաստան, Եգիպտոս, Ամերիկա և այլուր), ափեր, ուր դարեր շարունակ տարուգրման դառնութեան բաժակն ըմպած հայ ժողովուրդը հարկադրված էր թողնել իր հարազատ հայրենի հողը և դանդաժածային բնութիւնով գաղթել օտար երկրներ բախտ որոնելու:

«Պարսից փախստական հայք հնդկաց վաճառաշահ և երևելի քաղաքները բնակելով փոքրիկ գաղթականութեանց ձև առին, — գրում է նա իր հոդվածներից մեկում, — Տըլլի, Ակոա, Սուրատ, Պոմայ, Մատրաս, Մախսուտապատ քաղաքներում հայք հանգիստ ապրիլ սկսան և ի հետին չքավորութենէ հարստութիւն և գանձ ալ կը դիզեն...»²⁵:

Հայերի արտագաղթի վերաբերյալ Մերենցի արտահայտած այդ արտասովոր տեսակետի դեմ դուրս են գալիս Րաֆֆին, Գր. Արծրունին և այլ հասարակական գործիչներ:

«Մշակ»-ի 1876 թ. ապրիլ ամսին տպագրված «Գժատուն» վերնագիրը կրող հոդվածում Րաֆֆին խստորեն պախարակում է հայ ժողովրդին օտար հորիզոններ մատնացույց անող Մերենցին: «Մարդու կյանքը կապված է բնու-

24 Նույն տեղում, № 1155:

25 «Արևելյան մամուլ», 1875, դեկտեմբերի 18:

թյան հետև և նրա մայրը է հողը,—գրում է Րաֆֆին,—եթե հայը կամեր ապագա և կյանք ունենալ, նա պետք է իր ապրուստը հիմնի հաստատուն հողի վրա և այդ հողը թող լինի այն, ուր սրբված և գնված է մեր նախնյաց արյունով»²⁶։

Անցյալ դարի 70-ական թվականներից սկսած հայ ազգային-ազատագրական շարժումների պատմության մեջ սկսվեց մի նոր շրջան։

Հայ առաջավոր մտավորականներ Գր. Արծրունին, Րաֆֆին, Ռ. Պատկանյանը թուրքական բարբարոսական տիրապետության ծանրատար լծից արևմտահայերի ազատագրության գաղափարը բացառապես կապում էին Ռուսաստանի հետ։ Նրանք կոչ էին անում հայերին՝ դիմել զինված պայքարի և սեփական ուժերով նվաճել դարերով երազած ազատությունը։

Մտավորականության մի այլ խմբավորում երկյուղ կրելով ժողովրդական զանգվածների հեղափոխական շարժումների աշխուժացումից, մամուլի էջերում հանդես էին գալիս զինված պայքարի գաղափարախոսության դեմ՝ համարելով այն ապարդյուն և անիմաստ։ Նրանք իրենց հողվածներում այն միտքն էին արտահայտում, թե ազատությունը հնարավոր է նվաճել խաղաղ ճանապարհով, ռեֆորմների միջոցով, եվրոպական պետությունների միջամտությամբ։ Այդ շրջանում Ծերենցի հողվածներում արտահայտված գաղափարները հակասական էին։

Երկյուղ կրելով մասսաների հեղափոխական շարժման արյունահեղությունից նա գտնում էր, թե հայ ժողովուրդը իր հույսը պետք է դնե ոչ թե զինված ապստամբության, քաղաքական պայքարի, այլ վերևից եկող ռեֆորմների վրա։

Այս հարցի կապակցությամբ նա 1876 թ. «Արևելյան մամուլ»-ի էջերում մի յուրահատուկ բանավեճ վարեց Արծրունու և Րաֆֆու հետ։ Ծերենցը խիստ քննադատության էր ենթարկում «Մշակ»-ի խմբագրին և նրա աշխատակից Րաֆֆուն այն բանի համար, որ նրանք կոչ են անում զինված ապստամբության և ժողովրդին մղում քաղաքական պայքարի։ Այստեղից ինքնին հասկանալի է դառնում հրապարակախոսի լիրերալ ռեֆորմիստական մտորումները։

«Մենք կուզենք, որ ամեն հեղափոխություն վերեն գա և ոչ վարեն,—գրում է նա,— վարեն եկած հեղափոխություն (թե որ հաջողին ալ) այնչափ աղետք, այնչափ թշվառությունք ունին, այնչափ արյուններու առիթ կլինին և հայ ազգը այնչափ քիչ արյուն ունի յուր երակներուն մեջ, որի կարողութենեն վեր է այդ մասին շոայլ լինել և ընդհակառակն վերեն եկած հեղափոխությունք միշտ հաստատ են և երբեք արյան գիներով չեն լինիր»։

Մ. Մամուրյանը մերժելով վաղեմի դաստիարակի լիրերալ-ռեֆորմիստական մտորումները, տողատակին գրում է հետևյալ ծանոթությունը. «Ներվի մեզ ըսել, որ այս մասին մեծն նամակագրին հետ տարակարծիք կգտնվինք։ Այդ դրությունն ամեն տեղի ու պարագայի չկրնար հատկանալ»²⁷։

Այստեղից հետևում է, որ Ծերենցը դեռևս չէր հասել նախնայանի՝ կացնի միջոցով հարցը լուծելու տեսակետին։ Ինչպես հայտնի է, Մ. Նալբանդյանը արևմտահայ ժողովրդի քաղաքական ազատագրության հարցը կապում էր սլավոնական երկրների հեղափոխական շարժման հետ, այլապես ոչ մի փոքր ժողովուրդ չէր կարող թուրքական վայրագ ինքնակալությունից ազատագրվել

26 «Մշակ», 1876, № 14։

27 «Արևելյան մամուլ», 1876, № 10։

ինքնուրույն ձևով: Այսպիսով, Մերենցը չկարողացավ հասկանալ, որ ժողովրդական մասսաների ազգային ու սոցիալական ճնշումներից ազատագրվելու միակ միջոցը դիմադրութեամբ պայքարն է:



1878 թ. փետրվարի 19-ին (մարտի 3-ին) ստորագրվում է ռուս-թուրքական պատերազմի արդյունքներն ամփոփող Սան-Ստեֆանոյի դաշնագիրը:

Այդ պայմանագրի համաձայն անկախ էին հռչակվում Սերբիան, Չերնոգորիան, Ռումինիան: Ինքնավարութիւն էին ստանում Բուլղարիան, Բոսնիան, Հերցեգովինան և Արևմտյան Հայաստանի մեծ մասը՝ Ղարսը, Արդահանը, Բայազետը:

Մերենցը Կիպրոսից հետևել է այն հրատապ հարցերին, որոնք վերաբերվել են հայ ժողովրդի պատմական դարգացմանը և նշանակալից են եղել ազգային դարձման համար: Սան-Ստեֆանոյի դաշնագրից հետո հայ ժողովրդի ցնծութիւնը խորապէս համակում է նաև Մերենցին:

«Հինգ հարյուր տարիներէ վերջ վերջապէս այն անտարբեր կարծիքով ազգայնական մը կ'ըզեր աշխարհիս վրայ ուր ազատութեան փափագ կը հայտնէր», — գրում է նա²⁸:

Սան-Ստեֆանոյի դաշնագրի 16-րդ հոդովածով եվրոպական դիվանագիտութեան խաղաղանկ էր մտնում Արևմտյան Հայաստանի «Բարվոքումների և բարենորոգումների», իսկ ավելի ուշ ինքնավարութեան կամ անկախութեան խնդիրը՝ «Հայկական հարց» անունով: Այդ հարցով սկսեցին զբաղվել եվրոպական մամուլը և առհասարակ, այսպէս կոչված, մեծ պետութիւնները՝ Գերմանիան, Անգլիան և Ֆրանսիան:

Բելիինի կոնգրեսի բացման նախօրյակին հայ մտավորականութեան մի զգալի մասը դրականորեն է ընկալում «Հայկական հարցը» և լուրջ հույսեր տալով եվրոպական պետութիւնների նկատմամբ: «...Վասնորի իրական և հաստատուն բան մը եթէ կարելի էր Տաճկաստանի մէջ եվրոպական պետութեանց ձեռնաշնորհութեամբ և երաշխավորութեամբ միայն կարելի էր», — գրում է Մերենցը:

«...Որ առանց եվրոպական պետութեանց միջամտութեան բան մը կարելի չէ, ոչ բարելավութիւն, ոչ ինքնուրույնութիւն և ոչինչ»²⁹:

Հայաստանի ինքնավարութեան իրականացումը կապելով եվրոպական դիվանագիտութեան միջամտութեան հետ, Մերենցը այդ նույն հոդովածում գրում է, որ «հայր մի բան կուզէ՝ ինքնավարութիւն: Այդ ինքնավարութիւն բառը չէր նշանակեր անկախութիւն, բոլորովին բաժանումն, որոշումն Օսմանյան պետութեան, ոչ մի խելահաս հայ այդ բանը չփնտրեց և չփափաքեց»³⁰:

Պատմական հետազոտեալները սակայն ճիշտ հակառակը ապացուցեցին: Մեծ պետութիւնների միջամտութեամբ Արևմտյան Հայաստանին ինքնուրույնութիւն շնորհելու հարցը ի դերն ելավ:

28 ԳԼԹ, Մերենցի ֆ. № 17, էջ 2:

29 ՌԵԼԵՂՈՒ Հայաստանիս, 1880, № 21:

30 Նույն տեղում:

Ծերենցը ապրեց խոր հիասթափություն: Հայ ժողովրդի պատմական ճակատագիրը սթափեցրեց նրան քաղաքական սին հույսերից, խորտակվեց և և՛ բողոքական պետությունների նկատմամբ եղած պատրանքը: Ատելությունը լցված և՛ բողոքական տերությունների հանդեպ նա «Ժամանակի ոգին և հայոց ապագան» նշանավոր հողավածում խիստ քննադատության ենթարկեց Անգլիայի վարած գաղութային նողկալի քաղաքականությունը: «Անգլիան բարոյապես և նյութապես պատասխանատու է և գործակից է ամեն անիրավությանց, որ Ասիո Տաճկաստանի մեջ տեղ ունեն 1878 թվականին հուլիսի 4-են վերջը», — գրում է նա³¹:

Շարունակելով իր խորհրդածությունները այդ հարցի կապակցությամբ, նա եղրակացնում է «Նրեսանց է Անգլիո ազատակամությունն ու ներողամտությունը»³²:

Դատապարտելով և՛ բողոքական մեծ պետությունների քար անտարբերությունը դեպի հայ ժողովրդի ազատագրության հարցերը, նրանց կողմից տրված խոստումները որակեց որպես դատարկ ու սնամեջ բառեր, որոնք ոչ մի արժեք չունենին: Նա հեզնում է բուրժուական մեծ պետությունների ցույց տված օգնությունը, որը իր միջամտությամբ հայ ժողովրդին կանգնեցրեց լիակատար կործանման առջև: «Եվ որովհետև Սան-Ստեֆանոյի և Բեռլինի սեղաններե ընկած փշրանքները հայուն կենաց փոքր ճարակ մը խոստացան, պետք էր, որ Հայաստանի և Կիլիկիո հայր ամեն տեսակ և ավելի տառապանաց ու հալածանաց ենթարկվի...»³³:

Բեռլինի կոնգրեսի նախօրեին անգլիական դիվանագետներին հաջողվեց խաբեբայությամբ թուրքերին պարտադրել կնքելու Կիպրոսի դաշնագիրը: որով ստրատեգիական նշանակություն ունեցող այդ կղզին հանձնվում էր Անգլիային և ի փոխհատուցումն դրա վերջինս հանդես էր գալիս Թուրքիայի երդվյալ պաշտպանի դերում:

«Յուր բոլոր դորությունը կրոնքին վրա դնելով (խոսքը Թուրքիայի մասին է — Վ. Շ.), հուսահատած յուր եվրոպական բոլոր երկրներեն, որ մեկիկ-մեկիկ կերթան յուր ձեռքեն, հուսահատած կղզիներեն, որոնց ամենեն մահմեդականը Կիպրոս յուր աղատ կամոր տվավ Անգլիո», — գրում է Ծերենցը³⁴:

Հրապարակախոսը մերկացնելով թուրքական բռնապետության դիվային քաղաքականությունը հայերի և առհասարակ Թուրքիային հպատակ քրիստոնյա ժողովուրդների նկատմամբ և այդ հարցում Անգլիայի «թուրքապաշտպան» ու կեղծ հայրենասիրական քաղաքականությունը, գրում է.

«Հիմա, այսօր Անգլիո շահերն կպահանջեն, որ փոքր Ասիո (մենք և Անգլիա Հայաստան բառը ոչ միայն շենք ճանաչնար, այլ այդ անունը հրեշոդ կղակաները պետք է ջախջախենք) մեր ունեցած երկրները աղատ մնան օտարին միջամտութենե և միջամտության ամեն առիթներե, ուստի այդ սուրբ նրապատակին հասնելու համար պետք է և պետական իրավունքը կպահանջե, որ որևիցե կասկածելի տարր անհետ ընենք, որպեսզի ապագան ապահովենք ուրեմն այդ ազգը վերցնելու, անհետ և անճետ ընելու ենք»³⁵:

31 «Փորձ», 1879, № 1, էջ 208:

32 նույն տեղում, էջ 210:

33 «Փորձ», 1879, № 7:

34 «Մեղու Հայաստանի», 1880, № 20:

35 «Փորձ», 1879, № 7:

Այդ դժնդակ պայմաններում իսկ Մերենցը չէր կորցնում հոգու տոկունությունն ու հավատը գալիքի հանդեպ. ավելին, նա փորձում էր ընդդիմադրության կազմակերպման և վտանգից զերծ մնալու դարմաններ առաջադրել:

Անկախ այն հանգամանքից, որ նրա առաջարկած միջոցները արմատական չէին և հազիվ թե խափանեին թուրքական կառավարության ոճրագործ պլանները, բայց և այնպես դրանք վկայում են հայրենասեր վիպասանի հատուկ մտահոգությունը իր ժողովրդի ճակատագրի նկատմամբ:

Մերենցին անհանգստացնող հոգեկան տվյալանք պատճառող բուն խնդիրը հայությանը դառնությունից ազատելու, լուսավորության և ազատության ուղիով առաջ տանելու խնդիրն է, այդ է՝ նրա հոգսերի հոգսը: Նա իր հոգվածների մեջ այդ գլխավոր հարցի առնչությամբ շոշափել է և այլ խնդիրներ, բոլոր դեպքերում հանդես բերելով ազնիվ հայրենասերի, ազատության և լուսավորության իսկական ջատագովի ողջախոհություն և հայ ժողովրդի ապագայի նկատմամբ պայծառ լավատեսություն:

Իբրև հրապարակախոս Մերենցը նշանակալից դեր է կատարել արևմտահայ լուսավորական-դեմոկրատական շարժման մեջ: Բր հրապարակախոսական փայլուն տաղանդով, կրքոտ և բուռն հոգվածներով նա իր դեմ է հարուցել տգետ և խավարամիտ հայ կաթոլիկ համայնքի թշնամանքը: Սակայն անլուր հալածանքներն ու սպառնալիքները չեն ընկճել հայրենասերի կամքը, նա շարունակել է մարտնչել խավարի ու հետամնացության դեմ, տարածելով լուսավորության գաղափարների սերմերը արևմտահայ անդաստանում:

Մերենցի հրապարակախոսական հոգվածները հայ հասարակական մտքի պատմության հետաքրքիր փջերից են:

Արևմտահայ հասարակական կյանքը ուսումնասիրող յուրաքանչյուր անձնավորություն չի կարող անուշադրության մատնել նրա հրապարակախոսությունը:

«Հ. Շիշմանյանը իբր հրապարակագիր և վիպասան երևան կուգա Մերենց ծածկանունով,— գրում է Ա. Արփիարյանը,— իր հոգվածները ախորժանքով կկարդացվեն, պատմական հմտությամբ լեցուն են: Իր վիպասանությունը մեր անցյալ կյանքեն առնված՝ դյուրընթեռնելի են»³⁶:

В. Л. ШАМЛЯН

ЦЕРЕНЦ-ПУБЛИЦИСТ

Р е з ю м е

Церенц (Овсеп Шишманиян) — выдающийся представитель западно-армянской литературы и истории общественной мысли второй половины прошлого столетия. Велики его заслуги в деле развития духовной культуры армянского народа. Богато и многогранно публицистическое наследие Церенца.

Используя публицистику в качестве идеологического оружия, Церенц своевременно откликался на животрепещущие вопросы современности, ярко и талантливо освещая их в своих статьях.

³⁶ «Բանբեր գրականության և արվեստի», գիրք I-ին, էջ 199:

Любовь к родине и народу, беспокойство о их судьбе, непримиримость к внутренним и внешним врагам, ко всему, что было чуждо армянскому народу—основные черты публицистики Церенца.

В данной статье исследуются выдвинутые Церенцом проблемы, которые были тесно связаны с общественно-политической жизнью западных армян—освободительное движение армянского народа, укрепление братских уз западных и восточных армян, провозглашение западноармянской конституции и др.

Публицистические статьи Церенца—яркая и интересная страница истории армянской общественной мысли.